



CONCELLO DE REDONDELA

Nº10/2014

**SESIÓN EXTRAORDINARIA CELEBRADA POLO PLENO DO CONCELLO
O DÍA 31 DE XULLO DE 2014**

ORDE DO DÍA

Único.- Actividades de control de pleno:

- 1** Mocións pendentes.
 - 1.1** Moción do PSdeG-PSOE sobre o mantemento do partido xudicial de Redondela.
 - 1.2** Moción do BNG sobre a xestión de espazos do edificio do Instituto Social da Mariña en Redondela.
 - 1.3** Moción do B.N.G. sobre os atrancos na tramitación de novas axudas RISGA (Renda de inserción social de Galicia).
 - 1.4** Moción de A.E.R. sobre contratos do Concello.
 - 1.5** Moción de A.E.R. sobre o dereito a decidir das persoas e dos pobos.
 - 1.6** Moción do B.N.G. Sobre a superación do modelo institucional do Estado Español e recoñecemento do dereito a decidir.
 - 1.7** Moción de A.E.R. Sobre o paseo de Cesantes.
- 2** Solicitud de comparecencias pendentes.
- 3** Rogos e preguntas pendentes.

Na Casa do Concello, sendo dez horas do día 31 de xullo de dous mil catorce, baixo a presidencia do alcalde Javier Bas Corugeira e a asistencia dos/as concelleiros/as: Miguel Ángel Álvarez Ballesteros, María Teresa París Blanco, Julio Alonso Monteagudo, Jesús Crespo López, María José Barciela Barros, Erminda Quelle Fernández, Ana María Alonso Alonso, Arturo González Barbeiro, Cándido Vilaboa Figueroa, Eduardo José Reguera Ocampo, Luís Alberto Orge Míguez, Digna Rosa Rivas Gómez, Antonio Cabaleiro Millares, Leonardo Cabaleiro Couñago, Antonio Vázquez Saco, Leticia González Guisande, José García Míguez, Cecilia Pérez Orge, Xoán Carlos González Campo e Alfonso Blanco Pérez, tamén asistiu o interventor do Concello Ángel Santamariña Rivera, actuando como secretaria a secretaria xeral acctal. da corporación Paloma Meno Rodríguez, constitúese o Pleno do Concello, en sesión extraordinaria, conforme á convocatoria e de acordo coa Orde do Día.

INCIDENCIAS

Con carácter previo ao tratamento dos asuntos incluídos na Orde do Día, a Corporación garda un minuto de silencio en lembranza das vítimas da violencia de xénero.-

Ás 12:00 horas o alcalde acorda facer unha interrupción de 30 minutos para gardar un minuto de silencio na porta do Concello e recesso.

A Presidencia declara aberta a sesión, en primeira convocatoria, procedéndose a tratar o primeiro punto da Orde do Día.



CONCELLO DE REDONDELA

Retíranse, sen se debater:

1. MOCIÓN DO GRUPO MUNICIPAL A.E.R. SOBRE COMEDORES ESCOLARES NO VERÁN.
2. MOCIÓN DO GRUPO MUNICIPAL DO PSDEG-PSOE SOBRE A ADOPCIÓN DUN PLAN DE APOIO Á ALIMENTACIÓN INFANTIL.

Retírase, logo do seu debate:

1. MOCIÓN DO GRUPO MUNICIPAL A.E.R. SOBRE O PASEO DE CESANTES.

ÚNICO.- ACTIVIDADE DE CONTROL DE PLENO

I. MOCIÓN.

1.1 MOCIÓN DO GRUPO MUNICIPAL DO PSdeG-PSOE SOBRE O MANTEMENTO DO PARTIDO XUDICIAL DE REDONDELA.

ANTECEDENTES

Moción presentada polo grupo municipal do PSdeG-PSOE o día 16/04/2014 con número de rexistro xeral de entrada 2014005571 que a continuación se transcribe:

“O Goberno ven de anunciar a supresión dos Partidos xudiciais existentes en Galicia, para concentrar aos xuíces nas capitais provinciais e crear Tribunais de instancia. En Galicia esa medida suporá a desaparición de 41 partidos xudiciais e unha fonda alteración do funcionamento da xustiza, da accesibilidade dos cidadáns e dos custos derivados.

A unha cidadanía espallada no territorio, debe corresponder unha planta dos servizos públicos que facilite o achegamento dos cidadáns. Os actuais partidos xudiciais veñen dando resposta á litixiosidade pero tamén á proximidade. Esquecer esta non mellora aquela, só a cambia de lugar. Pero crea outros problemas ós profesionais da xustiza, funcionarios, avogados, procuradores, ás entidades auxiliares, aos concellos, e sobre todo á cidadanía.

Esta medida centralizadora forma parte dunha política xudicial fondamente lesiva para os cidadáns. O Goberno do Estado paralizou os procesos de modernización tecnolóxica, de posta en funcionamento da nova oficina xudicial e de creación de prazas. Está anunciada a modificación dos Rexistros Civís. Agora proponse a desaparición dos partidos xudiciais e a concentración da actividade xurisdiccional nas capitais de provincia.

O Goberno promulgou unha nova lei de taxas, disuasorias pola súa contía e restritivas para as persoas con menos recursos. Agora a supresión de partidos xudiciais incrementará os custos de desprazamento. Fica esquecida a defensa dos dereitos dos cidadáns e o acceso a unha tutela xudicial efectiva, como garantira o artigo 24. 1 da Constitución Española.

Xa o pasado 25 de maio de 2012 o grupo municipal socialista presentou unha moción que foi aprobada por unanimidade pola corporación municipal de Redondela na que se pedía manter as demarcacións xudiciais existentes ata a actualidade.

Por todo o exposto, solicítase ao pleno da corporación municipal o seguinte ACORDO:

1. Instar á Xunta de Galicia a reclamar do Goberno de España o mantemento do Partido Xudicial de Redondela.
2. Dar traslado deste acordo ao Consello da Avogacía, á Xunta de Galicia, ao Consejo General del Poder Judicial e ao Ministerio de Xustiza.”

INTERVENCIÓN

O concelleiro BLANCO PÉREZ di que van a votar a favor da moción.



CONCELLO DE REDONDELA

O concelleiro GONZÁLEZ CAMPO di que é unha situación que vai a afectar á cidadanía, establecense uns criterios únicos para todo o Estado, non tendo en conta as peculiaridades do noso país, se se suprinen partidos xudiciais vai a supoñer unha involución democrática e vai a alonxar ás/ós cidadáns da administración de xustiza.

A concelleira PARIS BLANCO di que desde os municipios galegos e institucións están a traballar para chegar a acordos para respectar as peculiaridades de Galicia e que se manteñan os partidos xudiciais, indica que varios Alcaldes reuníronse para evitar a supresión dos partidos xúdiciais en Galicia porque entenden que se da un agravio. Van a apoiar a moción, propón deixar enriba da mesa a moción e debatela conxunta coa moción presentada polo grupo municipal do PP na sesión ordinaria a celebrar pola tarde.

O concelleiro ORGE MÍGUEZ di que defenden que se manteña o partido xudicial de Redondela, respecto a deixar enriba da mesa a moción e debatela conxunta coa moción do partido popular, di que as mocións non son iguais e que a van a manter. Entende que cando o Alcalde inaugurou as obras de reforma do Xulgado de Redondela, debeu defender a continuidade do partido xudicial.

O concelleiro GONZÁLEZ CAMPO di que deben manterse os partidos xudiciais de todo o país, debe manterse a cercanía da administración de xustiza a todos os cidadáns. O Alcalde debeu convocar unha xunta de voceiros para comunicar o seu posicionamento. Van a apoiar a moción nos termos que se recollen.

A concelleira PARIS BLANCO di que é mellor unha posición conxunta de todos en defensa dos partidos xudiciais e non de forma individual. Van a votar a favor, aínda que non están de acordo co expositivo da moción. Manifesta que a reforma íntegra é necesaria, pero deben ter en conta as peculiaridades dos territorios, e entenden que ese traballo non se fixo.

O concelleiro ORGE MÍGUEZ di que non é negociable a perda do partido xudicial de Redondela, xa que é fundamental. O Alcalde non actuou coa forza que tivo que ter actuado.

VOTACIÓN E ACORO

O concello pleno en votación ordinaria, por unanimidade dos seus membros presentes, sendo vinte e un votos a favor (10 do PP, 8 do PSdeG-PSOE, 2 do BNG e 1 de AER) aproba a moción transcrita nos antecedentes.

1.2 MOCIÓN DO GRUPO MUNICIPAL B.N.G. SOBRE A XESTIÓN DE ESPAZOS DO EDIFICIO DO INSTITUTO SOCIAL DA MARIÑA EN REDONDELA.

ANTECEDENTES

Moción presentada polo grupo municipal do BNG o día 16/04/2014 e con número de rexistro xeral de entrada 2014005576, que se transcribe a continuación:

“No Concello de Redondela existe unha crecente demanda por parte de colectivos e asociacións para a realización de diversas actividades. Este interese de actividades de carácter “social” saca á luz a importante carencia de locais e espazos públicos propiedade ou xestionados polo propio concello. Estas eivas, supoñen en moitos casos que se teñan que axustar horarios e espazos, que non sempre cobren a demanda arriba mencionada.

Hai xa varios meses que a Confraría de Mariñeiro e Pescadores de Cesantes, desaloxou as dependencias que ocupaba no edificio propiedade do Instituto Social da Mariña, trasladándose a unhas dependencias no porto. A “Casa do Mar”, dispón dende entón dun novo espazo, que a entender do BNG está infrautilizado. Súmase esta dependencia a varias salas que este edificio posúe, e que ben poderían ser aproveitadas para a súa xestión por o Concello de Redondela.



CONCELLO DE REDONDELA

Dende hai varios anos, unha parte deste edificio está sendo utilizado pola policía local de Redondela. Tamén hai sitio para a policía nacional, unha cafetaría, e as oficinas do propio Instituto Social da Mariña.

Enclavado na Marisma, ubícase nun entorno de equipamentos de carácter educativo e deportivo. Esta situación privilexiada, podería definir perfectamente o futuro máis inmediato do edificio.

No ano 2013, as ANPAs da EEI. De A Marisma, e do CEP Santa Mariña, iniciaron os procedementos para a posta en marcha do comedor escolar. Este servizo de apoio á conciliación da vida familiar e laboral, púxose en marcha no curso 2013/2014. Ao longo da xestión, barallouse a posibilidade empregar algunha sala como comedor. Finalmente, sen coñecer os motivos, debeu ubicarse noutro local.

Por todo o arriba exposto, Xoán Carlos González Campo, ao abeiro do Regulamento Orgánico do Concello, solicita a adopción dos seguintes ACORDOS:

1. Que o alcalde presidente do concello de Redondela inicie as xestións pertinentes para a cesión dos locais do edificio propiedade do Instituto Social da Mariña situado na Marisma de Redondela.
2. Que a planificación de actividades a realizar neste edificio teñan un marcado carácter educativo ou de interese social.
3. Iniciar os trámites de cesión á maior brevidade posible.”

INTERVENCIÓNS

O concelleiro BLANCO PÉREZ di que van apoiar a moción.

O concelleiro REGUERA OCAMPO di que van apoiar a moción.

A concelleira PARIS BLANCO di que a intención das ANPAs de por en marcha un comedor social ven de lonxe, sendo consciente disto o goberno municipal, manténdose reunións e facilitándolle as xestións, o Concello solicitou autorización para impartir cursos, servizos socias e ensino. Respecto á cesión, está xestionado, está nun proceso de retrocesión administrativa segundo sinala a Administración titular, a Tesourería Xeral de Seguridade Social, cando se remate o proceso se dará conta. Sinala que cando se comunique a acta de ocupación e se produza a cesión a favor do Concello, se informará aos partidos. Remata propoñendo a retirada dos puntos dos acordos da moción.

O concelleiro GONZÁLEZ CAMPO di que non se opón a que lles faciliten información. Di que os comedores cada vez son más demandados. Pregunta á concelleira París Blanco se están asinados a renovación dos convenios para o ano que ven. Non hai resposta por ningunha administración dende hai máis dun ano, pero se non hai resultados a xestión fracasa.

O concelleiro REGUERA OCAMPO di que non é certo que as propostas de comedor escolar non foran atendidas polo anterior goberno, o que non había era espazo. Solicita que se axilicen as xestións.

A concelleira PARIS BLANCO di que todos os puntos da moción xa están xestionados e reitera a retirada da moción, pon a disposición dos grupos a información. Engade que fixeron dúas peticións por escrito á Tesourería Xeral da Seguridade Social respecto á tramitación da cesión.

O concelleiro GONZÁLEZ CAMPO di que non houbo capacidade de xestión dende hai máis dun ano. O motivo da moción é forzar a que o goberno municipal se reúna co organismo correspondente para axilizar a tramitación.

O Sr. alcalde propón facer cambios no texto dos acordos:

- No punto 1. onde di que se “inicie” que diga “continúen” as xestións.



CONCELLO DE REDONDELA

- No punto 3. redactarase do seguinte xeito: “Que os trámites de cesión sexan á maior brevidade posible”.

Todos os presentes están a favor.

VOTACIÓN E ACORDO.-

O Concello pleno, por unanimidade dos seus membros, acorda aprobar a moción anteriormente transcrita , cos cambios propostos polo alcalde no acordo, que queda do seguinte xeito:

- “1. Que o alcalde presidente do concello de Redondela continúe coas xestións pertinentes para a cesión dos locais do edificio propiedade do Instituto Social da Mariña situado na Marisma de Redondela.
- 2. Que a planificación de actividades a realizar neste edificio teñan un marcado carácter educativo ou de interese social.
- 3. Que os trámites de cesión sexan á maior brevidade posible.”

1.3 MOCIÓN DO GRUPO MUNICIPAL B.N.G. SOBRE OS ATRANCOS NA TRAMITACIÓN DE NOVAS AXUDAS RISGA (RENDA DE INSERCIÓN SOCIAL DE GALICIA).

ANTECEDENTES

Moción presentada no rexistro xeral de entrada polo grupo municipal do BNG o día 16/04/2014 con número 2014005576, que se transcribe a continuación:

“No último informe remitido polo valedor do Pobo ao Parlamento galego recóllese: “Este ano, como os inmediatamente anteriores, produciuse un aumento nas solicitudes de axudas sociais ante situacións de necesidade, como son as Rendas de Integración Social de Galicia ou as Axudas de Emerxencia Social. Tamén medrou o número de queixas en relación con elas, sobre todo por denegacións que se consideraban inxustificadas ou por atrasos nas resolucións deses procedementos, que pola súa proia natureza deben resolverse con urxencia.”

Nesta liña, son varios os concellos e tamén as persoas que denunciaron os atrasos de máis de sete ou oito meses de atrasos e incumprimentos nas tramitacións da RISGA e da AES (Axuda de Emerxencia Social). A Lei de Inclusión de Galiza recolle:

“Artigo 37. Resolución

1. Unha vez finalizada a instrución do expediente, o órgano competente de ámbito provincial da Administración autonómica elaborará a correspondente proposta de resolución e ditará a resolución, que deberá ser notificada no prazo de dous meses desde a entrada da solicitude da RISGA en calquera dos rexistros do órgano competente para resolver.”

No recente informe de Cáritas española podemos comprobar como os datos a pobreza ofrecen un panorama desolador, sobre todo na Galiza. O informe sinala que na Galiza a pobreza infantil pasou dun 16,9% en 2007 a un 22,2% en 2012. Asemade, indica que 30.000 fogares non reciben ningún tipo de ingresos, e son xa unhas 465.000 persoas as que viven na Galiza baixo o límite da pobreza.

Estas axudas para poder fazer fronte a situacións de extrema necesidade e pobreza teñen urxencia para as persoas demandantes. Dende o BNG consideramos prioritario que se cumpla a Lei de Inclusión social de Galiza e que se poñan en marcha de inmediato de maneira urgente a tramitación das axudas da RISGA, para o que se deben cumplir os prazos que se establecen a este respecto.



CONCELLO DE REDONDELA

Por outra banda, este incremento de persoas en exclusión social, consecuencia das erráticas políticas económicas aplicadas durante a crise, converten en papel mollado os propagandísticos anuncios da Xunta relativos ao incremento da dotación na RISGA para 2014, de apenas 7 millóns de euros, cando para o pagamento da débeda se consignaron sete veces máis (53 millóns de euros), e demostran a necesidade de achegar máis fondos públicos para as solicitudes se resolvieren en prazo e para non incorrer en demoras inxustificábeis.

Por todo isto, o grupo municipal do BNG solicita do Pleno da Corporación a adopción dos seguintes ACORDOS:

1. Instar á Xunta de Galiza a cumplir coa Lei 10/2013, de 27 de novembro, de Inclusión social de Galiza que, no seu artigo 37, recolle como prazo para a resolución dunha solicitude de RISGA dous meses.
2. Instar á Xunta de Galiza a incrementar a dotación de fondos no programa da RISGA ante o incremento de persoas en situación de exclusión social.

INTERVENCIÓN.-

O concelleiro GONZÁLEZ CAMPO logo da lectura da parte expositiva propón un cambio do texto do acordo, que queda cun único punto:

1. Instar á Xunta de Galicia a incrementar a dotación de fondos no programa da RISGA ante o incremento das persoas en situación de exclusión social.

O concelleiro BLANCO PÉREZ di que apoian a moción.

A concelleira RIVAS GÓMEZ di que apoian a moción, di que o goberno do PP está a levar recortes en materias sociais, critica o atraso na tramitación dos expedientes da RISGA, son coñecedores de que a concelleira ten constancia desta situación.

A concelleira PARIS BLANCO di respecto aos atrasos nas resolucóns dos expedientes da RISGA que é causa da intervención de distintas administracóns na súa tramitación: Comunidade Autónoma e Concello e, que os atrasos tamén son debidos aos trámites e documentación que teñen que cubrir os propios solicitantes.

Respecto ao recollido na exposición de motivos da moción, di que segundo os datos do INE de 2008 a 2012 hai unha redución na taxa de pobreza e das causas de exclusión. O goberno autonómico está aumentando as cantidades destinadas á RISGA.

O concelleiro GONZÁLEZ CAMPO di que hai un importante sector da poboación no umbral da pobreza, sendo importante neste senso o informe de Cáritas. Saben que os expedientes de tramitación da RISGA son complexos porque cada vez hai máis demandantes, teñen información de que en Redondela hai 90 casos e que a principios de ano tramítáronse 35 expedientes pero que non teñen resposta. O goberno galego debe asumir as súas responsabilidades, porque a Lei da uns prazos e se están a incumprir. Debe incrementarse a dotación de fondos.

A concelleira RIVAS GÓMEZ di que o PSdeG-PSOE ven denunciando a situación desde hai fai anos. Van a apoiar a moción co novo acordo.

A concelleira PARIS BLANCO di que non hai contradición no informe de Cáritas e do INE. Respecto aos atrasos volve a incidir na triple responsabilidade na tramitación: Comunidade Autónoma, Concello e solicitante. Entende que debe ampliarse e reforzarse o persoal dos servizos sociais. Na comparecencia do último pleno falou dos traballos que se fixeron con anterioridade e os feitos polo novo goberno. Apoian o novo acordo pero non todo o contido da exposición de motivos.



CONCELLO DE REDONDELA

O concelleiro GONZÁLEZ CAMPO di que se hai atrasos na tramitación non é culpa dos traballadores sociais, o atraso é causa da xestión do goberno municipal. A Xunta ten unha responsabilidade na tramitación da RISGA pero o Concello tamén a ten para axilizar as xestións.

VOTACIÓN E ACORDO.-

Sometida a votación a moción anterior, o pleno do Concello, por unanimidade dos concelleiros/as presentes, polos vinte e un votos (10 do PP, 8 do PSdeG-PSOE, 2 do BNG e 1 de AER) coa modificación do acordo, quedando nun único punto, sendo o seguinte:

- 1. Instar á Xunta de Galicia a incrementar a dotación de fondos no programa da RISGA ante o incremento das persoas en situación de exclusión social.

1.4 MOCIÓN DO GRUPO MUNICIPAL A.E.R. SOBRE CONTRATOS DO CONCELLO.

Moción que presenta o grupo municipal AER o día 29/05/2014, con número de rexistro de entrada 2014008284 que di o seguinte:

“Nos últimos anos ven sendo unha preocupación común o problema da corrupción, e semellan estar todos de acordo en que a transparencia supón o mellor medio para a loita contra esa lacra.

No seu momento presentamos unha moción, que foi rexeitada por todos os partidos do pleno, propoñendo un modelo que fixera posible a fiscalización, por parte da oposición, das contratacóns que desde o Concello se fan polo método directo sen publicidade.

Entendendo que este é un tema recorrente a nivel estatal e que se están a publicar os índices de transparencia das diferentes entidades administrativas, propoñemos situar a Redondela no máis alto dese índice.

Dado que no seu momento pareceules moi complicado o sistema de ter un listado de empresas ordenadas por sectores de servizos, obras, etc., e co ánimo de adaptarnos a modelos más sinxelos, propoñemos ao pleno do Concello de Redondela os seguintes acordos:

Que cada vez que se realice unha contratación directa sen publicidade, se comunique aos voceiros de tódolos grupos os seguintes datos:

- Modelo de invitación transmitido ás diferentes empresas.
- Xustificación e criterios empregados polo alcalde para a elección das empresas invitadas.
- Obxecto do contrato.
- Importe do contrato.

INTERVENCIÓN

A concelleira PÉREZ ORGE di que o problema de corrupción non é un problema xeneralizado. Defende as Administracións transparentes e democráticas. Defenden o Concello de Redondela como institución democrática e transparente. Van a apoiar a moción.

O concelleiro ORGE MÍGUEZ di que van apoiar a moción.

O concelleiro ÁLVAREZ BALLESTEROS di que o solicitado provocaría un colapso da administración non hai persoal suficiente e que polo órgano de goberno se facilita información aos distintos grupos políticos.

O concelleiro BLANCO PÉREZ di que agradece o apoio a BNG e PSdeG PSOE, a corrupción é un problema que preocupa, saben da escaseza do persoal pola imposibilidade de contratar.



CONCELLO DE REDONDELA

A concelleira PÉREZ ORGE di que a corrupción é respecto ás persoas pero non debe xeneralizarse, porque non todos os políticos son iguais. Noutras mociones votouse en contra porque entendían que era unha carga para os traballadores.

O concelleiro ORGE MÍGUEZ di que van a votar a favor da moción.

Por petición do Sr. alcalde solicitando a intervención da secretaria accidental en relación ás obrigas que poden acordarse no pleno respecto á publicación dos contratos, claréxase que a publicidade dos contratos faise de acordo co disposto na lexislación, non estando obrigado o alcalde a publicar respecto aqueles procedementos que a lexislación non o esixe, sendo facultativo.

O concelleiro ÁLVAREZ BALLESTEROS di que se lles está facilitando a información que solicitan e que cumpren coa Lei.

O concelleiro BLANCO PÉREZ di que cos acordos propostos na moción non prexulgan que haxan irregularidades, o que queren é adiantar a aplicación da Lei de Transparencia que entrará en vigor en decembro do presente ano.

VOTACIÓN E ACORDO.-

Sometida a moción anteriormente transcrita a votación ordinaria, ésta é aprobada por maioría dos/as concelleiros/as presentes por once votos a favor (8 do PSdeG-PSOE, 2 do BNG e 1 de AER) e dez votos en contra (10 do PP)

1.5 e 1.6.- MOCIÓN DO GRUPO MUNICIPAL A.E.R. SOBRE O DEREITO A DECIDIR DAS PERSOAS E DOS POBOS e MOCIÓN DO GRUPO MUNICIPAL B.N.G. SOBRE A SUPERACIÓN DO MODELO INSTITUCIONAL DO ESTADO ESPAÑOL E RECOÑECIMENTO DO DEREITO A DECIDIR

ANTECEDENTES

Debátense de xeito conxunto as mociones presentadas polos grupos municipais AER e do BNG pero os acordos votaranse por separado:

Moción presentada polo grupo municipal AER que a continuación se transcribe:

“O 15 de decembro de 1976 celebrábase o chamado referendo sobre a Lei da Reforma Política que, asumindo a monarquía herdada do franquismo coma forma de organización política do goberno e do Estado, establecía un sistema bicameral e abría as portas á redacción dunha nova constitución.

Todos os cidadáns e cittadás que teñen hoxe menos de 59 anos non puideron participar nese proceso, do mesmo xeito que todas as persoas que hoxe teñen menos de 54 anos non puideron participar no referendo que aprobou a Constitución española do ano 1978. É dicir, máis do 69% da poboación hoxe viva non pudo votar a Constitución, non pudo decidir sobre a forma de Estado que esta consagra. É máis, 3 de cada 4 cidadáns que hoxe teñen menos de 75 anos tiveron que asumir unha forma de organización política do Estado decidida por outros, nun proceso de transición herdado do franquismo e tutelado militarmente.

Queremos decidir, temos dereito a decidir como nos organizamos politicamente, e a abdicación do Xefe do Estado é unha oportunidade única para que os cidadáns e cittadás decidan. Un plebiscito, entendido como a consulta que os poderes públicos someten ao voto popular directo para que aprobe ou rexeite unha determinada proposta sobre soberanía, cidadanía, etc., semella o mecanismo axeitado para que a poboación poida decidir sobre o seu futuro.

Esta consulta vinculante que podería cuestionar o modelo consagrado pola Constitución de 1978, abriría a porta a un proceso constituínte no que a estrutura territorial e o dereito a decidir



CONCELLO DE REDONDELA

dos pobos que hoxe conforman o Estado, quedase garantido, posición que nós colectivamente defendemos.

Consecuentemente, proponse ao Pleno municipal a adopción do seguinte ACORDO:

Reclamar do Goberno do Estado e do seu Presidente a convocatoria e organización dun plebiscito no que os cidadáns e cittádinas poidan decidir, nos próximos meses, sobre a forma de organización política do Estado, máis concretamente sobre a monarquía parlamentaria consagrada na Constitución de 1978 de xeito que, se esta é rexeitada, se inicie un proceso constituyente que regule a forma de organización política e territorial, salvagardando o dereito a decidir das persoas e dos pobos.”

- Moción presentada polo grupo municipal do BNG coa seguinte tenor literal:

“O pasado 2 de xuño coñecemos a noticia da abdicación do xefe do Estado español, o rei Juan Carlos I, e a proposta de continuidade do anacrónico réxime monárquico que padecemos. A monarquía é un réxime incompatíbel cun sistema democrático, un réxime "vitalicio" e "hereditario" establecido "pola grazia de Deus" e que supuxo, no caso español, a continuidade co franquismo. Por outra parte, existe nestes momentos unha fonda desafección a unha monarquía inmersa en escándalos de corrupción, con prácticas profundamente antidemocráticas e que deixan en evidencia o seu papel de simples vividores a custa da cidadanía.

Estamos a asistir a unha operación de cosmética para salvar o réxime, sabedor de estar sendo cuestionado pola inmensa maioría da poboación que non se identifica nin se sente representado pola familia real. Nesta conxuntura, ao BNG non lle vale unha simples mudanza de caras que dean continuidade ao réxime unitario e centralista deseñado na Transición e perpetúen a monarquía como símbolo e garante dessa unidade. O que a cidadanía galega precisa é liberdade e capacidade para decidir. E nese espazo verdadeiramente democrático, onde se garanta o dereito de autodeterminación dos pobos, non ten cabida ningún rei. Por todo isto, xulgamos importante que se inicie un proceso constituyente, baseado na soberanía dos pobos, onde Galiza sexa referente político.

Nos últimos anos asistimos a un proceso de recentralización política que mingua, aínda máis, a capacidade da Galiza para decidir sobre si propia, sobre os seus sectores produtivos, sobre o seu futuro. E isto, en medio dunha non menos profunda crise do sistema político español, que atinxe todas as institucións que o conforman, nomeadamente a monarquía. Foi esta mesma monarquía a que veu funcionando como principal elemento simbólico dun sistema político que nos nega como nación e que impide o noso libre desenvolvemento como pobo.

Por todo isto, o grupo municipal do BNG solicita do Pleno da Corporación de Redondela a adopción do seguinte ACORDO:

Instar á Xunta de Galiza a que demande do Goberno do Estado español o inicio dun proceso constituyente onde as nacións sexan o referente político, para garantir o dereito de autodeterminación dos pobos que conforman o Estado español reconécedo o noso dereito a decidir.”

INTERVENCIÓNS

O concelleiro REGUERA OCAMPO di que van a apoiar o acordo de AER pero non o do BNG. Di que o PSOE apoia a Constitución Española do 1978, cren que é o momento de plantear este debate e convocar un plebiscito sobre república ou monarquía parlamentaria, porque cren que a república é un concepto de democracia, sendo a monarquía á data de hoxe anacrónica e que este proceso no creba o apoio constitucional dado polo PSOE no seu día Constitución. Remata engadindo que o Senado debe ser unha Cámara territorial efectiva, debéndose recoñecer a diversidade nacional.



CONCELLO DE REDONDELA

O concelleiro ALONSO MONTEAGUDO di que cando se fala de república se fala de tempos pasados, a república non debe considerarse como partidista, de dereitas o de esquierdas, debe tratarse dende un punto de vista diferente. O debate non debe ser república ou monarquía, porque a monarquía actual é similar á república se se plantexa presidencialista porque sería substituír unha persoa por outra.

O concelleiro BLANCO PÉREZ di que coa moción non se pide que se vote sobre a situación actual do estado, non formulan o debate entre república ou monarquía, se ese fora o debate se estudaría qué tipo de república queren, o que piden agora é o dereito a decidir, porque é un dereito democrático.

A concelleira PÉREZ ORGE di que na moción do BNG non se fala de república, se fora o caso falarían de república galega, as nacións deben ser o referente político, sendo un dereito de autodeterminación do pobo galego. O que solicitan é o dereito a decidir, xa que o xefe do estado é vitalicio e non se elixe, e hoxe a monarquía é corrupta. Nas reformas da Constitución os partidos do PP e do PSOE van da man, sinala que a monarquía é un sistema anacrónico, se se abrise o debate a monarquía podería saír fortalecida, sinala que é un inmobilismo. Coa moción non queren unha III república centralista senón iniciar o debate para iniciar o proceso de decidir.

O concelleiro REGUERA OCAMPO di que se decantan pola república como forma de organización do estado, o que non están de acordo é que haxa nestes tempos unha monarquía parlamentaria. Debe facerse un plebiscito para que decida a xente.

O concelleiro ALONSO MONTEAGUDO di que é un proceso que debe facerse con tranquilidade, pero non é o momento para iniciar xa inmediatamente un plebiscito, debe coñecerse o modelo de república que se quere, facerse un debate de cal é o modelo que quere a cidadanía, a cuestión é si o modelo do estado atende ás necesidades que se plantexan, aos problemas e ás novas situacions.

O concelleiro BLANCO PÉREZ di que a corrupción na monarquía e na república é nas persoas é non no modelo, o que queren é o dereito a elixir a organización do estado, un exercicio de democracia e participación.

A concelleira PÉREZ ORGE di que o que non quixo dicir é que a república e monarquía, como institucións, son corruptas, senón as persoas que as integran. O que queren é o dereito a decidir das persoas, que se inicie o debate de reforma da Constitución española. Van a apoiar a moción de AER.

VOTACIÓN E ACORDO.-

Sometida a moción do grupo municipal de AER a votación, apróbase por maioria dos/as concelleiros/as presentes, por once votos a favor (8 do PSdeG-PSOE, 2 do BNG e 1 de AER) e dez abstencións (10 do PP).

Ao respecto da votación da moción do grupo municipal do BNG, foi rexeitada por dezaoito votos en contra (10 do PP, 8 do PSdeG-PSOE) e tres votos a favor (2 do BNG e 1 de AER)

1.7 MOCIÓN DO GRUPO MUNICIPAL A.E.R. SOBRE O PASEO DE CESANTES.

ANTECEDENTES

Moción presentada polo grupo municipal AER o día 25/06/2014 con número de rexistro xeral de entrada 2014010061 que se transcribe a continuación:

“En primeiro lugar, lembremos o que di a Lei de Costas sobre a Servidume de Tránsito, non seu artigo 27º:



CONCELLO DE REDONDELA

“1. La servidumbre de tránsito recaerá sobre una franja de 6 metros, medidos tierra adentro a partir del límite interior de la ribera del mar. Esta zona deberá dejarse permanentemente expedita para el paso público peatonal y para los vehículos de vigilancia y salvamento, salvo en espacios especialmente protegidos.

2. En lugares de tránsito difícil o peligroso dicha anchura podrá ampliarse en lo que resulte necesario, hasta un máximo de 20 metros.

3. Esta zona podrá ser ocupada excepcionalmente por obras a realizar en el dominio público marítimo-terrestre. En tal caso se sustituirá la zona de servidumbre por otra nueva en condiciones análogas, en la forma en que se señale por la Administración del Estado. También podrá ser ocupada para la ejecución de paseos marítimos.”

Ao longo destes anos de desenvolvemento do Plan Marisma, fixérонse diversas modificacóns por mor das dificultades atopadas, ou para adaptarse mellor ás necesidades concretas coas que nos imos atopando.

Neste tramo final no que xa entramos para rematar con todas as inversíons previstas, contémplase unha intervención na praia de Cesantes, que inclúe un curioso carril bici proxectado non sabemos ben para quen, xa que non sabemos como pensan chegar alí coa bici ou como pensan ir cos fillos/as ou netos/as segundo o caso. En AER entendemos que se debe prolongar o paseo existente ata a zona denominada “dos estaleiros”, co cal se permitiría o acceso á praia sen percorrer toda a “estrada da praia”, e mesmo acceder á Punta paseando ou en bici dun xeito máis sinxelo.

Parécenos que despois de ter permitido unha tras outra un montón de ilegalidades urbanísticas, pretenden agora facilitarlle os servizos (saneamento, vados,..) e mirar para outro lado. Agora imolo converter en zona VIP, paseo de bici para residentes, con acceso en coche e se cadra ata con aparcadoiros privados en zona pública.

Dada a covardía amosada polos diversos gobiernos locais para enfrentar ese problema, cando menos pensamos que se debe actuar cun pouco de sentido. ¿Queremos poñer en valor a costa ata Cesantes? Nós si. E propoñemos que se modifique o proxecto e que a inversión prevista reverta en toda a cidadanía.

Resúltanos difícil de entender tamén que a servidume de tránsito non só ten uso como rúa para transito de vehículos particulares, senón que ademais contan con licenzas de “¡VADOS!”.

Lembrámoslles que no 14 de marzo de 2006 publicouse no BOE a posta a información pública do proxecto de senda peonil entre a Praia e as instalacións portuarias de Cesantes Fase I. Proxecto ao que o anterior equipo de governo renunciou, perdendo una oportunidade única, xa que o faría Costas, uníndose esta renuncia á serie de despropósitos que se veñen producindo no noso litoral.

No tramo no que pretenden facer o paseo podemos dicir que xa existe un paseo consolidado, deteriorado polo paso dos coches máis que polo temporal. Ademais, está sendo rehabilitado o muro de contención por Costas. Imos facer una dobre inversión no mesmo lugar no espazo dun ano que non vai mellorar para nada a recuperación do areal. ¿Ou teñen pensado desfacer o que fixo Costas e eliminar o muro como recomendou o arquitecto municipal se queremos facer efectiva a recuperación do areal?

Pensamos tamén que debe modificarse o proxecto e a inversión, continuando o paseo dende onde remata a intervención de Costas en dirección ao peirao de Cesantes contemplando a opción máis respectuosa e favorable para a recuperación do areal.

Por todo o anterior propoñemos ao Pleno do Concello de Redondela os seguintes acordos:

1. Presentar proposta de modificación do proxecto, para prolongar o paseo ata a zona denominada “dos estaleiros”.



CONCELLO DE REDONDELA

2. Limitar o acceso aos vehículos particulares e darlle carácter peonil ao paseo, tanto ao que está feito como ao tramo futuro, ademais de retirar con carácter inmediato as licenzas de vado outorgadas.”

INTERVENCIÓNS

A concelleira PÉREZ ORGE di que toda obra nas inmediacións da praia de Cesantes debe facerse con sentido e con preservación do areal. Di que o proxecto debe levarse ao consello parroquial para o seu coñecemento, non coñecen o proxecto do paseo. Respecto aos vados da zona descoñecen se son legais, entenden que o Concello os concede atendendo aos informes técnicos e normativa, o pleno non pode decidir a súa retirada. Queren que o paseo sexa peonil e de bicicletas e non de vehículos. Respecto aos verquidos, áinda que as vivendas sexan ilegais, entenden que deben conectarse.

O concelleiro CABALEIRO MILLARES di que pertence ao consello parroquial de Cesantes, acordándose nunha xuntanza que se lles daría información e coñecemento previo aos colectivos afectados. Non teñen coñecemento do proxecto. O PsdeG-PSOE apoiou no seu día as actuacións do Plan Marisma Máis, estando pendente de execución parte das obras. Pregunta se se falou cos veciños, se se vai a levar a concurso público. Reforza a denuncia dos muros da praia, porque vai a afectar ao litoral.

O concelleiro GONZÁLEZ BARBEIRO di que hai un tramo feito áinda que en mal estado de conservación, o que pide AER no primeiro punto do acordo da moción está fóra de tempo. Non van apoiar a moción. Di que as dificultades que había para executar este proxecto no ano 2006 son as mesmas que agora. Respecto aos muros levan feitos fai tempo.

O concelleiro BLANCO PÉREZ di que retiran o punto primeiro do acordo se non se pode facer por estar fóra de tempo, pero manteñen o segundo.

A concelleira PÉREZ ORGE di que ao BNG non lle consta o proxecto de execución e non saben o que van a apoiar co mantemento do segundo punto do acordo, e o consello parroquial o descoñece. Remata solicitando que se deixe enriba da mesa.

O Sr. alcalde sinala que atopáronse cunhas partidas máximas para cada actuación no Plan Marisma Máis, se está estudiando como optimizar mellor os recursos, as primeiras actuacións van a ir na liña de recuperación dos muros que están en mal estado, na inspección técnica aconsellan o cambio dos muros, é unha actuación dentro do entorno do Plan Marisma Máis sobre a recuperación dos muros e é o que se vai a plantear no consello parroquial. Estase en contacto co departamento de costas da Xunta para que se execute o máximo posible, e despois, cando se poida, executarase un proxecto definitivo do paseo, que se porá en coñecemento do consello parroquial.

O concelleiro CABALEIRO COUÑAGO di que coa retirada do punto primeiro o segundo punto quedaría desvirtuado e solicita que se quede enriba da mesa.

O concelleiro GONZÁLEZ BARBEIRO di que debe darse cumprimento ao Plan Marisma en canto ao orzamento, o que se pretende é optimizar os recursos.

O concelleiro BLANCO PÉREZ di que se se tivo que cambiar a actuación como consecuencia da recuperación dos muros, van retirar a moción.

A moción retírase.

A Presidencia levanta a presente sesión, sendo as trece horas e cincuenta e catro minutos da data fixada no encabezamento, en proba de todo o que se redacta a presente acta, da que, como secretaria, dou fe.-